

Sungai Balok tercemar, ratusan ikan mati

UM 30/9/2024 Pg 38

Oleh DIANA SURYA ABD WAHAB
utusannews@mediamulia.com.my

KUANTAN: Penduduk khususnya nelayan sungai berhampiran Sungai Balok di sini, terkejut apabila mendapati ratusan ikan ditemukan mati dipercayai berpunca daripada air sungai tercemar.

Tinjauan *Utusan Malaysia* mendapati antara jenis ikan yang mati adalah duri, belukang, siakap, kitam dan gelama sehingga menjadikan kawasan sepanjang sungai itu berbau busuk.

Seorang nelayan, Amiruddin Abdul Raoh berkata, keadaan tersebut disedarinya ketika pulang daripada laut, kelmarin.

Menurutnya, pada mulanya dia menganggap ikan dibuang oleh mana-mana pihak namun setelah dilihat dengan dekat, dia mendapati keadaan ikan

tersebut seperti terkena racun sisa toksik.

“Ketika saya baru balik dari laut memang terkejut tengok banyak ikan yang terapung sepanjang sungai. Pada mulanya sangkaan ada nelayan yang buang sebab ikan duri biasanya dibuang tapi bila saya ambil ikan tu dan tengok matanya berwarna putih.

“Jadi kebiasaannya jika berlaku begini ia disebabkan toksik dalam sungai,” katanya ketika ditemui di sini kelmarin.

Seorang lagi penduduk tempatan yang juga merupakan pemancing sungai, Mohd. Ridhuan Abdul Aziz berkata, apabila berlaku pencemaran, ia bukan sahaja memberi kesan kepada kehidupan akuatik malah menjelaskan mata pencarian nelayan di sungai tersebut.

“Daripada rumah kita turun mencari rezeki bila sampai di

sungai tengok keadaan macam ini jadi sangat terkesan. Ramai penduduk kampung di sini rata-ratanya mencari hasil sungai untuk dijual.

“Kebelakangan ini memang susah, hendak dapat seekor ikan pun susah sebab keadaan air yang tak berapa baik... dulu ada juga ikan kecil-kecil sekarang semakin berkurangan,” katanya.

Sementara itu, Ahli Dewan Undangan Negeri (ADUN) Beserah, Datuk Andansura Rabu berkata, berdasarkan pemerhatian dan maklumat, ikan-ikan tersebut dipercayai mati di sebelah hulu sebelum dihanyutkan dan terapung ketika air sungai surut.

Jelasnya, pihaknya sudah menghubungi Jabatan Alam Sekitar (JAS) berhubung perkara itu bagi siasatan dan tindakan lanjut.



PENDUDUK dan nelayan setempat menunjukkan keadaan persisiran Sungai Balok di Kuantan, Pahang dipenuhi ikan mati yang semakin membusuk. - UTUSAN/ DIANA SURYA ABD WAHAB